

OFFERYNNAU STATUDOL CYMRU

2015 No. 1757

**Rheoliadau Plant (Perfformiadau
a Gweithgareddau) (Cymru) 2015**

RHAN 4

Cyfyngiadau mewn perthynas â phob perfformiad

Cymhwyso'r Rhan hon

21. Mae'r gofynion yn y Rhan hon yn gymwys i bob perfformiad trwyddedig ac i bob perfformiad, sydd wedi ei esemptio rhag y gofyniad i gael trwydded, o dan adran 37(3)(a) o Ddeddf 1963.

Cyflogaeth

22. Ni chaniateir i blentyn sy'n cymryd rhan mewn perfformiad gael ei gyflogi mewn unrhyw gyflogaeth arall ar ddiwrnod y perfformiad hwnnw na'r diwrnod wedyn.

Yr amserau cynharaf a hwyraf yn y man lle y cynhelir y perfformiad neu'r ymarfer

23.—(1) Mae Tabl 1 yn nodi'r amserau cynharaf a hwyraf y caiff plentyn fod yn y man lle y cynhelir y perfformiad neu'r ymarfer.

(2) Nid yw'r rheoliad hwn yn gymwys os y man lle y mae'r plentyn fel arfer yn byw neu'n cael ei addysg yw'r man lle y cynhelir y perfformiad neu'r ymarfer.

Tabl 1

<i>Oedran y plentyn</i>	<i>Yr amser cynharaf</i>	<i>Yr amser hwyraf</i>
O'i eni hyd nes y bydd yn cyrraedd 5 oed	07:00	22:00
O 5 oed tan oedran gadael ysgol	07:00	23:00

Presenoldeb mewn man lle y cynhelir perfformiad neu ymarfer a'r oriau perfformio

24.—(1) Mae Tabl 2 yn nodi uchafswm nifer yr oriau y caiff plentyn fod mewn man lle y cynhelir perfformiad neu ymarfer, y caiff berfformio neu ymarfer mewn un niwrnod neu berfformio neu ymarfer yn barhaus.

(2) Wrth gyfrifo nifer yr oriau ar unrhyw ddiwrnod y mae'r plentyn yn bresennol mewn man lle y cynhelir perfformiad neu ymarfer, rhaid ystyried unrhyw gyfnodau addysg sy'n ofynnol i gydymffurfio â threfniadau a gymeradwyir o dan reoliad 15, hyd yn oed os yw'r addysg honno'n cael ei darparu yn rhywle ac eithrio'r man lle y cynhelir y perfformiad neu'r ymarfer.

Tabl 2

<i>Oedran</i>	<i>Uchafswm nifer yr oriau mewn un niwrnod mewn man lle y cynhelir perfformiad neu ymarfer</i>	<i>Uchafswm nifer cyfan yr oriau perfformio neu ymarfer mewn un niwrnod</i>	<i>Uchafswm nifer parhaus yr oriau perfformio neu ymarfer mewn un niwrnod</i>
O'i eni hyd nes y bydd yn cyrraedd 5 oed	5	2	0.5
O'i eni hyd nes y bydd yn cyrraedd 9 oed	8	3	2.5
O 9 oed tan oedran gadael ysgol	9.5	5	2.5

Seibiannau ar unrhyw ddiwrnod pan fo'r plentyn yn perfformio neu'n ymarfer

25.—(1) Pan fo plentyn o dan bum mlwydd oed yn bresennol yn y man lle y cynhelir y perfformiad neu'r ymarfer—

- rhaidd i unrhyw seibiannau bara am gyfnod o bymtheng munud o leiaf, ac eithrio bod rhaidd, pan fo plentyn yn bresennol am bedair neu fwy o oriau yn olynol, i unrhyw seibiannau o'r fath gynnwys o leiaf un seibiant o ddeugain munud a phump a ddefnyddir at ddiben pryd bwyd; a
- rhaidd i unrhyw seibiant gael ei ddefnyddio at ddibenion prydau bwyd, gorffwys, addysg neu hamdden.

(2) Pan fo plentyn sy'n bum mlwydd oed neu drosodd yn bresennol yn y man lle y cynhelir y perfformiad neu'r ymarfer am fwy na phedair, ond am lai nag wyth awr yn olynol, rhaidd iddo gael o leiaf:

- un seibiant sy'n para am ddeugain munud a phump o leiaf ar gyfer pryd bwyd; a
- un seibiant arall sy'n para am bymtheng munud o leiaf.

(3) Pan fo plentyn sy'n bum mlwydd oed neu drosodd yn bresennol yn y man lle y cynhelir y perfformiad neu'r ymarfer am wyth awr neu fwy yn olynol, rhaidd iddo gael:

- y seibiannau sy'n ofynnol o dan baragraff (2); a
- o leiaf un seibiant arall sy'n para am bymtheng munud o leiaf.

(4) Yn ddarostyngedig i baragraff (5), rhaidd i blentyn gael seibiant sy'n para am awr a hanner o leiaf rhwng pryd y mae'n cymryd rhan mewn perfformiadau olynol pan fo, ar yr un diwrnod—

- yn perfformio'r un rhan neu'n cymryd rhan perfformiwr arall mewn mwy nag un enghraifft o'r un perfformiad gan gynnwys ymarferion, sy'n dod o fewn adran 37(2)(a) neu (b) o Ddeddf 1963, y mae trwydded wedi ei chael ar eu cyfer;
- yn cymryd rhan mewn perfformiadau o dan drwyddedau gwahanol a roddwyd mewn cysylltiad â'r plentyn; neu
- yn cymryd rhan mewn perfformiad y mae trwydded wedi ei chael ar ei gyfer ac mewn perfformiad nad yw'n ofynnol cael trwydded ar ei gyfer o dan adran 37(3)(a) o Ddeddf 1963.

(5) Pan fo'r perfformiad neu'r ymarfer cynharach yn para llai nag un awr, ac

- (a) bod y perfformiad neu'r ymarfer canlynol yn digwydd yn yr un man perfformio neu ymarfer; neu
- (b) nad oes angen unrhyw amser ar gyfer teithio rhwng y perfformiad neu'r ymarfer cynharach a'r un olynol,

caniateir i'r seibiant rhwng y perfformiadau (neu'r ymarferion) hynny gael ei ostwng i isafswm o ddeugain munud a phump.

Isafswm nifer y seibiannau dros nos

26. Yn ddarostyngedig i reoliad 30, rhaid i blentyn gael seibiant dros nos sy'n para deuddeg awr o leiaf rhwng ei bresenoldeb yn y man perfformio neu ymarfer.